

两浙金石志



兩浙金石志卷九

揚州阮元編錄

宋妙喜泉銘碑

妙喜泉銘

育王爲浙東大道場地高無水僧衆苦之紹興丙子佛日  
禪師杲公受請住持周旋其間命僧廣恭穿穴茲地爲一  
大池鍤鍤一施飛泉溢涌知州事姜公秘監見而異之名  
曰妙喜無垢居士爲之銘曰  
心外無泉泉外無心是心卽泉是泉卽心或者疑之以問  
居士心在妙喜泉是育王云何不察合而爲一居士曰來  
汝其聽取妙喜未來泉在何處妙喜來止泉卽發生心非

泉乎泉非心乎謂余未然妙喜其決之

紹興丁丑三月丙寅無垢居士張九成書

妙喜老僧宗杲重說偈曰

謂泉卽心謂心卽泉無垢居士作一弗穿有出有入有正  
有偏居士恁麼妙喜不然徐六檐板如見一邊泉只是泉  
難喚作心心只是心決定非泉是義不正亦復不偏泉乎  
心乎亦非棄捐擬議思量十萬八千

山門監寺僧善卿立石

右碑文正書九行後附行書二行在鄞縣張九成字  
子韶錢塘人事蹟見宋史按陳傅良止齋集云世未  
有言無垢先生善作字者而筆勢如此令人起敬無

垢擯斥流落道不爲世用以死其書此爲僅傳者而  
淳古雄健正不可泯姜秘監者師仲也

宋趙彥膚等大滌洞題名

趙公口彥膚章口卞基吳石韞玉衛稷秀實同遊紹興二  
十七年三月十六日

右在大滌洞內摩崖正書五行字徑三寸

宋建庚申勝會記

淨勝院口於紹興二十七年口口口住持僧水口謹口口  
口口口淨口口本院遇庚申日入口口口合口水口口  
口口口口施大乘戒法傳口葉口口口口口口口口  
口口國安民口口口口口口口常轉口保口會信口各家平

善世生生同口種智口恩善報口有齊賢口口口生口  
佛口謹口會首名銜刊於此山永爲不口

都會首口氏十二娘王氏妙口李氏一孃呂氏口口口氏  
十五娘何氏口口口氏十口娘汪氏口口黃氏二娘口口  
口王氏八娘陳氏十口娘口口口娘口氏八娘口氏三娘  
口口口口李氏三娘口口口口口口口口口口

右在石龍院千佛頭摩崖正書八行行字不等後泐

西湖游覽志云俗稱昇仙宮宋時女僧妙清建高宗  
常臨觀焉有御愛松今觀此刻所題皆女氏足徵游  
覽志之說可信文云遇庚申日施大乘法戒殆卽道  
家三尸之說歟按夢梁錄社會門曰有善女人皆府

室宅舍內司之府第娘子夫人等建庚申會誦圓覺  
經俱帶珠翠珍寶首飾赴會人呼曰鬪寶會又曰每  
月遇庚申或八日諸寺庵舍集善信人誦經設齋此  
刻題名刊石亦一時盛舉今惟兔葵燕麥搖蕩春風  
摩娑殘碣不勝野花寶靨蔓艸羅帶之感

宋慧日峯三大字

慧日峯

紹興丁丑歲冬至日妙門居士陳思恭命工

闕

右在西湖慧日峯摩崖篆字徑一尺五寸款字正書  
徑一寸日字作古文峯字止存上山字西湖游覽志  
南屏山之凌空而中峙者爲慧日峯今以寺後卷石

刻慧日峯三字當之謬矣

宋東谷無盡燈碑

大宋國紹興府上虞縣管鄉市郭尙德坊第三保居住清  
信奉 三寶女弟子陳氏五娘施淨財三十六貫文入明  
州天童山東谷庵燭長明無盡燈一椀供養 先和尚覺  
禪師塔前功德祝獻自身行年本命元辰照臨星象懺滌  
罪愆莊嚴種智者

弟子莊宇妻吳氏百六娘共施淨財三十六貫文就東谷  
庵燭長明無盡燈一椀供養 觀音菩薩功德祝獻自身  
行年本命元辰乞求花男子早遂心願

女弟子莊四四娘施淨財三十六貫文就東谷庵燭長明



無盡燈一椀供養 本師釋迦如來功德答還先許願心  
圓滿仍懺罪愆莊嚴種智者

右伏惟 三寶證明

天龍炳鑒謹疏

泰州海陵縣居住清信奉 佛弟子樊賓并妻范氏妙真

男陳樊遵遷媳婦許氏小三娘張氏十二娘共施淨財三

十六貫文足入明州天童山東谷庵共點晝夜長明無盡

燈一椀供養 先和尚覺禪師塔前功德各薦門中先亡

久遠超昇寶界者

泰州興化縣招遠坊今寄居姜堰奉 佛弟子琴彥遷并

妻鍾氏三娘謹施淨財三十六貫文足開田三畝點盧舍

那佛閣善知識前無盡燈乙椀功德作來世之津梁獲宅

生之善報

泰州海陵縣姜堰居住奉 佛弟子周榮并妻李氏興晤

謹施淨財三十六貫文足開田三畝點盧舍邨佛閣善知識前無盡燈乙椀功德薦亡父周助二郎亡丈母陸氏四娘子懺悔罪愆莊嚴福報

紹興二十八年正月 八日募緣直歲僧智宣 山門監寺

沙門惠璋 住持傳法沙門法爲立石

右碑題額六字文正書兩列皆捨錢姓氏在鄞縣此里巷小民邀福之疏無盡燈卽長明燈自晉始也本命元辰照臨星象師巫枕秘迄今勿替花男子者親愛之也樊賓男爲陳樊遵者爲人後也並媳婦而遷

之也三十貫文足者當時陌不同有省錢也碑陰刻

宏智老人像

宋宏智禪師妙光塔碑

宋故宏智禪師妙光塔銘

有叙

左朝請郎直龍圖閣知太平州軍州事提舉學事兼管

內勸農營田使陽羨周葵撰

左宣教郎試起居舍人兼玉牒所檢討官兼權中書舍

人歷陽張孝祥書

左太中大夫權吏部尚書同脩國史兼侍讀會稽賀

允中題蓋

紹興戊寅春二月 詔諡明故州天童山景德寺僧正覺

宏智禪師塔曰妙光其徒相與侈

上德意刻之琬琰傳示永久且使來告求銘師塔余聞中國自東漢始有經像學焉者率以有爲爲功德逮梁益甚達磨自竺乾西來傳佛心印佛道由是大明至唐褒崇諸祖有易名名塔之號其去圓寂或已百年或二百年今師亡未幾而蒙

上四字之褒所以寵光之至矣非能荷佛法棟梁得佐師命脉攝化緇素爲人天師出入生死如遊戲事何以得此哉迺撫其示世之實序而銘之師李姓正覺名也隰州隰川人祖寂父宗道世學般若母趙氏嘗夢五臺山一僧解右臂環予之已而有娠遂屏葷茹及師之生右臂隆起如

環狀年甫七歲警悟絕人日誦數千言十一出家十五落  
髮十八游方三十四出世得度於淨名寺本宗大師得戒  
於晉州慈雲寺智瓊律師得灑于鄧州丹霞山德淳禪師  
初住泗州普照寺繼住舒州太平江州園通能仁眞州長  
蘆晚乃住今天童初師過舒蘄徧禮祖塔夢至一山寺長  
松夾道有句紀之曰松徑森森窈窕門到時微月正黃昏  
及至天童宛如昔夢故有終焉之志歲在戊午被旨  
住臨安府靈隱寺未閱月丐歸故於天童最久唯祖道自  
達磨五傳而離爲南能北秀其後益離而爲五家宗派今  
瀉仰灑眼二宗中絕而臨際雲門曹洞三家鼎盛顧其徒  
未必深究其師之道而各襲其跡更相詆訶未有能一之

者師嘗曰佛祖之燈以悟爲則惟證乃知若執其區區之跡則初祖見神州有大乘氣象崎嶇數萬里而來使有方便豈不顯以示人而少林九年似專修僻觀者六祖云道由心悟豈在坐也大慧亦云坐禪豈能成佛學者可便以是爲初祖之過耶蓋師初以宴坐入道淳以空劫自己示之廓然大悟其後誨人專明空劫前事惟師徹證佛祖根源機鋒峻激非中下之流所能湊泊而晝夜不眠與衆危坐三輪俱寂六用不痕宗通說通盡善盡美故其持身也嚴其倡道也文其莊嚴佛事接引迷塗亦唯恐不至自初得戒坐必跏趺食不過午所至施者相踵悉歸之常住閒以與餓疾者而一餅一鉢丈室蕭然諸行方厲而一性

常如非出于矯拂也淳作頌古今師敘其首芙蓉楷禪師見之曰僧中復有此耶吾宗不隊矣其遐能仁受長蘆之請適游雲居圓悟勁禪師見其提倡以偈送之有一千五百老禪將之語然辯才三昧自然成文非出於思惟也其住天童前後幾三十年寺爲一新卽三門爲大閣廣三十楹安奉千佛又建盧舍那閣傍設五十三善知識燈鑑相臨光景云入觀者如游華藏界海所以暉耀塵世使生厭離以發起善根而僧堂衆寮卧具飲食器所以處其徒者亦皆精緻華好如寶坊化城又卽濱海之隙築堤障其鹹鹵而耕之以給僧供未年至不發化人而齋厨豐衍甲於他方學者無一不滿得以專意于道然師所規畫人競趨

之不動聲色坐以告辨疑有鬼神陰爲之助而師無作相也然則師之所在願一見威儀聞警效效供養示歸依者越口百千里襁負而至戶外之屨常踰千數其辨道之勤得道之多獨冠一時而識曹谿之路者必能牧瀉山之牛非因衆力推出不肯輕以爲人當世賢士大夫亦樂與之游者內外進也辛丑秋九月壬申師入四明又命舟至越上徧見常所往來者若與之別冬十月己亥始還山飯客关語無異平日翌旦作遺書與佛日杲禪師且爲其徒書四句偈投筆而逝自佛日口育王與師相得驩甚嘗戲曰脫我先去公當主後事及佛日得遺書夜至天童凡送終之禮悉主之因舉師弟子灋爲繼席識者方知二尊宿各



傳一宗而以道相與初無彼此之間也龕畱七日顏色如  
生初議茶毗以收舍利或曰師嘗薙髮有幢火中者輒成  
舍利自是遺髮人所爭取豈嫌無舍利也耶丙午乃奉全  
身葬山之東谷自師之化風雨晦冥至葬開霽迄事復雨  
送者踰萬人彌亘山谷無不涕慕歎仰者壽六十七僧臘  
五十三度弟子二百八十人嗣法者嗣宗法智世釗道琳  
法潤信悟法爲慧暉了默師秀行從宗榮法聽清萃正光  
集成道園法濟明慧中翼法恭子靈師儼師全覺照法海  
皆於諸方坐大道場若其分化幽遠晦迹林泉則又未易  
悉紀也銘曰

師昔侍佛靈鷲山 受佛屬象來人間 慧刀慈力鑄世

頑 出入生死非其難 一性常如萬行圓 筆端三峽

爲波瀾 化城仍作寶所先 華藏界海生塵寰 攝化

四海犇入天 學者爭趨曹洞關 示以自己空劫前

得無所得非言傳 弟子所至闔法筵 無盡之燈耀大

千 海山秀處東谷原 我作銘詩詒永年

紹興二十九年七月望日住持嗣祖灑姪比丘宗珏石立

四明陳奇陳曦模刊

右碑篆額十字文三十一行正書在鄞縣按師姓李

名正覺隰州人母夢五臺僧解環而生以宿夢主天

童幾三十年辛丑十月書偈而逝文中歷序行業神

異兼有墮髮輒成舍利之異自是法門龍象其爲四

方奔湊宜矣周葵字立義宜興人紹興中侍御史見  
宋史本傳此其知太平時作也

宋趙伯衛題名

趙伯衛牧仲遊

紹興己卯九月十七日

右在定山摩崖楷書二行字徑寸餘伯衛紹興閒錢

塘令見縣志

宋刻金剛般若波羅蜜經

昔熙寧盛時賈文元公與名德耆舊三十有二人爲僧智  
利悟朋共書金剛經一卷今朝廷莫安四方無虞六和塔  
主僧智曇請于親貴鉅公接踵前規同寫此經刻

右在六和塔經文分三十二段正行各體書後跋語  
六行隸書寫此經刻下闕失去一石按主僧智曇見  
紹興乙卯四十二章經刻隆興二年尙書省牒碑其  
爲一時所刊無疑文元舊刻當時必有傳者今則不  
可見矣赤城志載淨名庵僧長吉嘗遊京師得參政  
宋庠以下一百四十五人所書般若經建堂以實之  
知當時習尙有然也

宋廣靈王廟碑

□□□□□□□□□□□□□□記

忠嘉威烈惠濟廣靈王姓鮑氏四明靈應廟之尊神也繇  
漢至今廟食是邦者千有餘歲其陰功靈德載於春官之

祀典見於宣和之

勅書至於出處本末又有諸公之記刻存焉口口之人所  
以祀王者不啻如子之事親而王之所以福斯民者亦若  
親之愛子凡有旱乾水溢饑饉瘟疫應禱如響故祠宇之  
奉雖口徧州里而人猶以爲報之未稱也育王山之西有  
市曰寶幢嘉祐中郡人欲便於禱祭迺營高燥地共築祠  
宇而奉之歷年浸久上雨旁風毀敝滋甚衆雖欲興葺而  
艱苦衣食者尙多以故曠歲弗舉有浮圖梵持者健而多  
能禱於王曰王能使吾鄉屢豐年我必力圖而新之已而  
年穀果登市井魚鹽商賈之利十倍前時向之艱苦衣食  
者一變爲富庶之俗持曰可作矣環祠之家欣然願從富

者出財壯者出力山居與甄者又以竹木瓦甃爲助凡爲  
殿廊五齋舍一僧廬三輔弊舉偏者五創於乙亥秋八月  
朔畢於冬十月晦明年正月元夕然燈數千枝民大和會  
祠下慶其成也持來請余爲記未幾而持死遂不果作余  
不忍以其死而食言姑記其大略俾刻諸廟云紹興三十  
年歲次庚辰正月望日前浙西安口口使司屬官臨穎陳  
雲達記新口州永豐縣令莆陽陳居仁書江州新建縣丞  
東山陳孚立石

右碑文正書十七行在鄞縣靈應廟按志神爲晉太  
始時鮑蓋生有祥光容貌英偉樂善好施任俠尙氣  
嘗射石沒鏃解海龍之戰建興四年醉終于家此文

云由漢至今未知孰是神祠晉永和時立于青山唐  
聖厯遷于城中歷代著績各有封號梁封永嘉侯崇  
寧改額曰靈應政和八年加惠濟宣和三年加威烈  
六年加忠嘉建炎四年加廣靈端平四年改威烈爲  
神聖嘉熙元年加忠嘉神聖惠濟廣靈王之靈亦  
昭昭已哉陳居仁莆田人紹興二十一年進士周必  
大陳公神道碑除華文閣直學士提舉江州太平興  
國宮官爵自莆田縣男至奉化郡開國侯

宋剡建通元觀碑

剡建通元觀記

夫通元觀之肇剡也原敖卯角時輒迺淨厥身遣厥慾慕

厥道冀求真全元氏之門憾世弗容宥進事內廷固荷天  
渥授以內侍官錫食玉食衣錦衣掌宮禁相玉宸攸與富  
貴亦極矣雖然詎敖志哉蓋嘗嘆曰富貴岑通也真全身  
寶也脫羈富貴而匪求真全是惜岑通而捐身寶者敖寧  
弗致於審耶因學觀心養性鍊質守形尋道機窮道奧真  
全企悟於豁然庶幾元元之妙有不昧於虛靈矣於是道  
竊修於宮居屢懇請於主上丐放山林圓就心學紹興庚  
午頂激皇衷命出主吳山寧壽觀手賜法名能真給福牒  
賚紫衣暨七寶頃田所賞之隆悉歸於觀供奉香燈泅命  
敖持堅養道祝國永長仲夏辭陞入山謹焚修密守鍊功  
幸幾圓弗辜廷慮己卯臘二日敖夜坐甫瞬間夢三茅君



偕跌胎禽旋遊山角狀若托於棲止伺明旦瞻之果見三  
鶴踰年是日鶴復來翔噫敖之感於三茅君驗曷殊甚也  
遂仰鶴稽顙矢構觀迎卽期相地剪莽斫荆鑿山平基運  
斤斲木前剏茅君之庭後豎玉清之殿築謁斗臺於乾維  
立放鶴亭於艮位經房丹屋起葢隨宜鉢室山門茂一不  
備工竣觀罔額特疏請沐御題曰通元仍加璽書于左煥  
耀元宇於戲觀幸矣哉額亦稱矣哉敖之心不亦愜矣哉  
且昔敖在內侍也寤寐之間念念於道故嘗履富貴而厭  
處談真全而樂聞是非薄緣種植元門宿慮有在以致求  
道而道得適請而請從弗拂至誠而玉成心事也不然奚  
以効修煉而獲悟夢茅君化鶴哉又奚剏觀成而請疏上

通元之題沛自九重而光福地哉是蓋敖秉初衷道機感  
召而應克若斯之神矣通元之造就豈偶然哉工始庚辰  
之丑訖程壬午之申請額月弦而石壁襄於月望也後之  
嗣觀者守之哉

皇宋紹興三十二年龍集壬午七月中元日奉勅左右街  
大都道錄少師賜紫衣真人法名能真鹿泉劉敖撰并書  
篆

右在杭州七寶山東南麓通元觀正書二十行行四  
十四字此鹿泉真人劉敖自述之文敖本典領寧壽  
觀置胥吏給清衛兵用大中祥符故事後十年遂請  
棄宜專奉寧壽香火詔如所請改左右街都道錄仍

領觀事加少師賜紫衣特以夢感之兆又卜地爲茅  
君玉清諸殿高宗御書通元二字賜之文中種種元  
門宿慮有在以下頗涉誇詡果出自肺腑胡十年而  
後棄官耶嘉定時又主上虞之明德觀則以寧宗后  
父楊漸故宅也文又云賚紫衣暨七寶此山之所由  
名也咸淳臨安志止載有三一宋鼎宋孝武帝孝建  
元年作一唐鐘本唐澄清觀舊物上有河東薛泚銘  
一褚遂良小楷陰符經陸游寧壽觀記似乎有六所  
云鴻鐘大鼎華蓋寶劍褚遂良吳道子之遺迹卓乎  
秘府之奇珍是也華蓋似是一物近志本咸淳志之  
說增以吳道子南方星君像玉靶劍七寶數珠軒轅

鏡爲觀中七寶吳道子畫及劍見陸游記惟數珠古  
鏡未考所自耳七寶今惟宋鼎尙在北直豐潤疑亦  
金人所徙其銘猶有傳者富貴岑通也語不可解今  
志改作夢幻請額月弦而石壁襄于月望未知上弦  
下弦月望則月中觀中鑿有石壁以刻諸種非履其  
地不知爲何語左右街本之唐人今志譌作衛篆額  
亦敖書而𠄎字從走記字從匹皆不足校

宋追復岳武穆王并賜諡告詞碑

追復少保兩鎮告

勅仁皇在位親明利用之勳神祖御邦首祭狄青之像蓋  
念舊者不忘于收拭而勸功者當急于褒崇朕祇稟睿謀

眷懷宿將茲仰承于素志肆盡洗于丹書故前少保武勝  
定國軍節度使武昌郡開國公食邑六千一百戶食實封  
二千六百戶岳飛拔自偏裨驟當方面智略不專于古法  
沉雄殆得于天資事上以忠至無嫌于辰告行師有律幾  
不犯于秋毫外摧孔熾之狂胡內翦方張之劇盜名之難  
揜衆所共聞會中原方議于櫜弓而當路力成于投杼坐  
急絳侯之繫莫然內史之灰逮更化之云初示褒忠之有  
漸思其姓氏旣仍節制于岳陽念爾子孫又復孤惇于嶺  
表欲盡還其寵數乃下屬于眇躬是用峻升孤棘之班疊  
畀齋壇之組近畿禮葬少酬魏闕之心故邑追封更慰轅  
門之望豈獨發幽光于旣往庶幾鼓義氣于方來嗟夫聞

李口之爲人殆將撫髀闕西平而未錄敢緩旌賢如其有知可以無憾可特追復少保武勝定國軍節度使武昌郡開國公食邑六千一百戶食實封二千六百戶奉勅如右牒到奉行紹興三十二年十月十六日

追封鄂王告

勅人主無私子奪一歸萬世之公天下有真是非不待百年而定睠言名將夙號蓋臣雖勲業不究于生前而譽望益彰于身後緬懷英槩申畀愍章故追復少保武勝定國軍節度使武昌郡開國公食邑六千一百戶食實封二千六百戶贈太師諡武穆岳飛蘊蓋世之材負冠軍之勇方略如霍嫖姚志滅匈奴意氣如祖豫州誓清冀朔屢執訊

而獲醜亦舍爵而榮勳外愴威靈內殫謨畫屬時方講好  
將歸馬華山之陽而爾獨奮身欲撫劍伊吾之北遂致樊  
蠅之集寢成市虎之疑雖懷子儀貫日之忠曾無其福卒  
墮林甫偃月之計孰拯其寃逮國論之旣明果邦誣之自  
辯中興之主恩念不忘重華之君追褒特厚肆眇冲之在  
御想風烈以如存是用頒我恩綸綈之王爵裂熊渠之故  
壤超敬德之舊封豈特慰九原之心蓋以作六軍之氣於  
戲修車備械適當閒暇之時顯忠遂良罔間幽明之際諒  
惟泉窆歆此寵光可特追封鄂王餘如故嘉泰四年六月

二十日

賜諡告詞

勅主爾忘身茲謂人臣之大節諡以表行必稽天下之公  
言申錫贊書追告幽窆故太師追封鄂王諡武穆岳飛威  
名震于夷狄智略根乎詩書結髮從戎前無堅敵枕戈勵  
志誓清中原謂恢復之義爲必伸謂忠憤之氣爲難遏上  
心密契詔札具存夫何權臣力主和議未究凌煙之偉績  
先罹偃月之陰謀李將軍口不出辭聞者流涕藺相如身  
雖已死凜然猶生宜高皇眷念之不忘肆孝廟矜哀之備  
至還故官而禮葬頒祠額以旌褒逮于先帝之時祔以眞  
王之爵旣辯誣于累聖可無憾于九京然而易名之典雖  
行議禮之言未一始爲忠愍之號旋更武穆之稱朕獲覩  
中興之舊章灼知皇祖之本意爰取危身奉上之實仍采



克定禍亂之文合此兩言節其壹惠昔孔明之志興漢室  
若子儀之光復唐都雖計効以或殊在秉心而弗異垂之  
典冊何嫌今古之同符賴及子孫將與山河而並久英靈  
如在茂渥其承可依前故太師追封鄂王特與賜諡忠武  
奉勅如右牒到奉行寶慶元年五月二日

皇明隆慶三年歲次己巳秋七月上澣之吉亞中大夫浙  
江等處承宣布政使司左叅政吳郡王世貞立石 錢塘  
縣知縣問成章同立 邑人戚熙臣書 陶烈沈萬春刻  
石

右在忠烈廟正書二十八行行五十九字字徑一寸  
此明時修廟追刻諸誥于石也按宋史本傳孝宗復

飛官以禮改葬讀此詔則高宗末已復少保武勝定  
國軍節度使矣而當時無諡寶慶元年誥有始爲忠  
愍之號或在斯時也寧宗嘉泰四年贈諡武穆追封  
鄂王理宗寶慶元年改諡忠武至今遵用焉他若淳  
祐六年始以王爲太學神有正顯昭德文忠侯勅寶  
祐四年有正顯昭德文忠英濟侯勅景定元年有忠  
文王勅少帝德祐丙子有加忠文昭烈王勅並見于  
刻石今無有能言之者矣

宋高宗賜劉能真御製詩刻

宋高宗皇帝詩

簡易高人道崇元性自真身常居太極心已遠凡塵玉陛

辭榮祿瑤臺役鬼神辛勤三十載羨爾道心淳

太白寵從東南馳衆嶺環合青分披烟雲厚薄皆可愛木  
石疎密自相宜陽春已歸鳥語樂溪水不動魚行遲生民  
無不得處所與茲魚鳥皆熙熙  
憶昔長江阻颶風于今神馬又成龍炎興指日中原復  
是茅君翊翼功

賜能真

御寶

臣何宗亮撫刻

右在吳山通元觀摩崖正書十三行行十五字徑一  
寸是刻無年月在觀後石壁上按敖觀記訖程壬午  
之申石壁襄于月望是高宗二十二年七月之十五  
日高宗六月內禪刻石應在孝宗時此七月不改元

故不書年月仍附紹興末

宋劉能真創建通元觀記

皇宋紹興壬午歲中元節日都錄少師鹿泉真人劉能真  
開山建觀請賜額曰通元奉安元始天尊三茆真君香火  
朝元禮聖福國太平能真謹題

右在通元觀後摩崖隸書七行行十一字徑一寸五  
分後有正德戊辰本觀徐道彰跋云右石壁記乃開  
山劉真人手筆也距今四百餘年兩經兵燹舊刻不  
傷字角微剝道彰虞後愈昏艱于辨認故少加抉剔  
庶祖師之文不泯而嗣觀者有所鑑云

宋蔡大王廟碑

蔡大王廟記

上缺

胡允恭

仁益盧允德

郡士王棠

上缺

春秋紀

異近於惟立祠祭近

下缺

海靈江之南號

義城鄉在唐為義誠鎮鎮之白巖

下缺

靈響

之所求應

若

下缺

禱之故上已有祈重陽有報孟冬朔日

下缺

者亡

慮

下缺

宥省其容題其號飲食必祭之

下缺

大任嘗謂余

曰吾神

下缺

禍福如相與語言他日無不驗者小人有所

為不臧必示以凶敗之象吾鄉

下缺

順者舉

神貺也達

可聞而異之一日林公請叙其事記于廟以詔來者乃

下

缺

老言

神晉人也其先蓋出於周文王子成王叔父度

莫知其名有三子

下缺

今塑像立于左一長婦一息

女侍立夫人之

下缺

極難步

神獨躍馬馳騁上下使人

怖慄因目之曰聖

下缺

為

好擲釣擇潭谷佳處

終日憇息遠近知其神

下缺

道晴雨之期

去乃共於山下創宇圖形而祀之日益

稱為

大王蓋尊之也

下缺

像漂流數十里止于定光山之側

水退 有一虎

下缺

之下許請徙廟于此則聽是夕虎聲

下缺

又尋

則廟無全基咸出矢言

神

下缺

之境前後

如萬馬奔嘶雜以金鼓居人

下缺

觀如故其靈顯類此始

神之祭

下缺

誦佛經易之以殺菽

神欣然從之今遂

以為

下缺

曰聰明正直之謂神又曰神無以靈將恐歇

下

缺必有以感人者惜乎未聞有人為能揚其盛烈告之於

朝使得與趙靈康並爲丹丘命祀

下缺

靈康自漢列名方

術劍化于章安逮我宋 葉 神宗皇帝元豐中始爲立

廟 下缺 靈不泯則褒榮有時今 大王自晉爲 神隱而

未著林公迺能撫其始末表而出之 下缺 殆未可知也

上方肇稱盛禮靡神不秩將見前旌後樂榮 下缺 之寵可

無紀述以備討論故爲之記紹興壬午一陽日進士李達

可記夏知言篆林鵬程書 勸緣盧冲林宗懋進

士林大任立石 助緣盧儻林忠盧懿孫宗誠潘用安吳

日宣日昌林璋子 庭 下缺 子 敦復敦叙 胡阜進士

盧翼陳岳林鴻漸盧樞等

唐碣宋碑王靈呵護磨刀損石卽犯神 下缺 謹書

右碑篆額五字文正書廿八行多殘缺在臨海縣南  
鄉義城大王廟其正面卽杜雄墓誌此李達可述林  
大任之言而記之也謂神生于晉能道晴雨之期居  
人圖形祀之後像漂流有虎聲之異遂爲是廟而惜  
其不能與趙靈康並膺命祀故撫其始末以冀將來  
之秩祀趙靈康名炳字公阿漢之東陽人能爲方術  
療病後入章安人未之知也乃升茅屋梧鼎而爨爨  
爨而屋無損臨水張蓋長嘯呼風亂流而濟于是從  
者如歸章安令惡其惑衆收殺之人爲立祠于永康

白鶴山靈康廟云

宋韓允寅等題名



會稽韓允寅武林錢致桐江方釋之攜男迅縮以紹興壬午三月辛酉來

右題名六行行五字正書左行字徑三寸在長興縣顧渚明月峽中摩崖距唐楊漢公題名數步方釋之曾任縣令見邑志職官表據此知其籍貫并任事已在紹興末年矣

宋岳珂銅爵

精忠報國 岳珂建造

右岳氏祭爵高五寸六分深二寸七分口徑長四寸五分濶二寸三分腹容四合重五百十四銖腹內鐫篆書精忠報國四字腹外左側豎耳有小印曰岳珂

建造亦篆書按岳元聲精忠類編宋孝宗在潛邸念忠武之寃鑄全身銅像鐫南宋紹興三十二年壬午秋七月樞密司判樂則生造子霖敬祀綿綿永傳又岳珂于嘉泰四年鑄奉祀忠武祭器宋亡悉埋土中是爵蓋祭器中之一為桐鄉金主事德輿所藏今歸西湖岳廟俾其裔孫永守之

宋佛窟山轉輪藏碑

台州佛窟山轉輪藏記

南岳道人謂正信居士曰禪涌頃自七閩來游天台經行佛窟之山下缺山于主人私於禪涌曰寶因奉檄居此餘三十年始至之日山荒屋下缺敗像設黜闇殘僧三四甕

無盛煙竇因愛養松竹如護嬰兒下缺月侵星刀耕火種

五年而食飽十年而林增下缺黃冠與夫車下缺迹朝吾

門者有飯夕吾廬者有歸供須可下缺靡間言而往來下

缺莫我察也獨居士即之室渴名平心若頁蓋知我

者下缺募眾緣作轉輪寶藏以屋五千四十八卷之書將

成而未有記下缺累居士居士其許我哉上人試商之禪

涌退而即寺之坤隅下缺謂寶藏者天宮峭崿地軸安安

奇鬼神海面金碧煥爛下缺目驚心其制作神麗

遠近容有之如因制成茲緣空維居士下缺為記之以

之曰吾察竇因有可書之善三辛勤十閨女下闕南

游士其至如歸而因也垢面袖手曾無德色是一可書

下缺 道微魔民熾盛盜常住物貿遷大刹死期將至方關

西 籠 下缺 絡愚雛俾稱嗣法分香賣履返甚於俗流因

則 之是二可書 下缺 而藏緣其三也微子之言猶不

可以無籍况恩勤之請乎紹興 年 下缺 二月初七日記

成於雪峯致之使刻諸石會稽虞沈季行篆蓋

知事僧靈悟立石 郡士王裳模

右碑篆額九字文行書十七行在臨海縣南鄉昌國

寺寺舊名佛窟周廣順二年建宋大中祥符改昌國

院正信居士不知何許人此緣寶因奉檄居山募作

轉輪藏而正信述之也前述寶因居山是苦行僧後

述魔民熾盛愚雛嗣法擬之分香賣履亦深涉世故

有激之談歟

宋高宗御書道德經幢殘刻

口德經

口上德不德章

上德不德是以有口口口口失德

下缺

禮者忠信之薄口口口口前識者

下闕

昔之得一者章

昔之得一者天得一以清地得一以寧口得一

下闕

為正口貴高口恐口故貴以賤為本口口下為是

下闕

反者道之動章

反者道之動弱者道之用天下之口生於有有生於口

下缺

上士聞道章

上士聞道勤而行之中士聞道若存□□□士聞道

下闕

隱无名夫□道善貸且□

□□□□

右第一面存字第二面首行道生一章存道生及物

萬四字第三面首行聖人無常心章存聖人字末行

善建者不拔章存其字

□□□□□  
含德之厚章

含□□□比於

下闕

知者不言章

知□□言

下闕

□□□□□□□□□□  
以正治國章

以下缺

自下缺

□□□□□□□□□□  
其政悶悶章

其政悶悶其民淳淳其政察  
以下缺

治人口天章

治人事天莫如嗇夫唯嗇是以口復口復謂之口積德重  
積德則無不克無不口則莫知其極莫知其極可以有國  
有國之母可□□□□□謂□□□□□生久視之道

治大國章

治大國若烹小鮮以道莅天下者其鬼不神非口鬼不神

其神不傷民非其神不傷民聖人亦不傷民夫兩不相傷故德交歸焉

右第四面存字

大國者下流章

大國者下流天下之交天下之牝牝常以靜勝牡以靜爲下故大國以下小國則取小國小國以下大國則取大國故或下以取或下而取大國不過欲兼畜人小國不過欲入事人兩者各□□□欲故大者宜

下缺

道者萬物之奧章

道者萬物之奧也善人之寶不善人之所口美言可以市尊行可以加於人人之不善何棄之有故立天子置三公



雖有拱璧以先駟馬不如坐進此道古之所以貴此道者  
何也不曰求以□□□□□□邪故爲

下缺

### 爲无爲章

爲无爲事无事味无味大小多少報怨以德圖難於其易  
爲大於其□天下□□□□作於易天□之□□必作於  
細是以聖人終不爲大故能成其大夫輕諾必寡信多易  
必多難是以聖

下缺

### 其安易持章

其安易持其未兆易謀其脆易撲其微易散爲之於未有  
治之於未亂合□□木生於豪□九層之臺□□累土千  
里之行始□□下爲者敗之□者失之是以聖人無爲故





江巡撫揚州阮元題

正書六行行二十四字

右第八面無字今刻跋語

右幢今在瑞石山文昌樓下凡八面高四尺周五尺六寸每面正書十三行行八十餘字惟第一第四第五可讀餘五面無字當時朝奉郎兼吳益王敎授盧壯夫有御書記刻石見中興館閣錄又郭天錫日記云高宗御書道德經石刻經幢二亭覆之元妙觀志略云舊在元妙觀後移中興觀明季無有言之者其遷徙不知何時今從市橋獲其一榻出止存下卷德經三面知實二幢而道經不可復覩天錫云二亭覆之語不誣也道德經本惟唐石刻本最古今易州有

二本一景龍二年一開元二十一年錢宮詹曰皆道  
經卷上德經卷下與河上本同晁說之跋王弼本謂  
其不析道德而上下之猶近于古不知陸德明所撰  
釋文正用輔嗣本題云道經卷上德經卷下晁氏所  
見特宋時轉寫之本而翻以爲近古亦未之考矣今  
幢德經二字尙存經中異同如反者道之動章天下  
之物傳本皆作天地萬物其政悶悶章其民淳淳傳  
本皆作醇醇治大國章不傷民三民字傳本皆作人  
海爲百谷王章以其善下之傳本無其字悉與開元  
本合石刻雖殘可徵古者如此惟唐刻不分章此則  
分章悉以首句標題不似傳本有體道第一養身第

二各有一目爲八十一章也西湖遊覽志又載小麥嶺太清宮有恭聖楊太后書道德經石幢今亦無有能言之者矣

宋高宗忠實二大字

忠實

右在勝果寺後摩崖正書橫列字徑二尺四寸舊本有歟不知何時鑿去據成化杭州府志是宋高宗書舊有忠實亭見武林梵志云在介亭旁

宋刻家人卦

三三家人利女貞彖曰家人女正位乎內男正位乎外男女正天地之大義也家人有嚴君焉父母之謂也父子

子兄兄弟弟夫夫婦婦而家道正正家而天下定矣象曰  
風自火出家人君子以言有物而行有恆初九閑有家悔  
亡象曰閑有家志未變也六二无攸遂在中饋貞吉象曰  
六二之吉順以巽也九三家人嗃嗃悔厲吉婦子嘻嘻終  
吝象曰家人嗃嗃未失也婦子嘻嘻失家節也六四富家  
大吉象曰富家大吉順在位也九五王假有家血恤吉象  
曰王假有家交相慶也上九有孚威如終吉象曰威如之  
吉反身之謂也

右在南屏興教寺後摩崖隸書十二行字徑四寸餘  
按此刻相傳如聚訟潛說友臨安志葉紹翁四朝聞  
見錄吳自牧夢梁錄皆云司馬溫公手筆周密武林

舊事謂爲唐人遺跡舊志又謂司馬池守杭時書惟  
朱竹垞據宋鑑稱紹興六年十月庚辰上諭大臣曰  
司馬光隸字真似漢人朕有五卷日夕置座右所書  
乃中庸與家人卦皆修身治家之道不特玩其字而  
已今摩崖所刊合乎宋鑑當是諸大臣聞思陵面諭  
請刊于石者洵爲此刻的據近時南康謝蘇潭中丞  
撫粵西于融縣老君洞得溫公書家人卦摩崖刻卽  
南屏所摹者未有跋云先太師溫國文正公書此于  
家曾孫備因倅融水謹摹刻于郡南老君洞之石壁  
紹興十有九年歲在屠維大荒落重午日記後列銜  
題名者錢慎陳戩朱天申黃忱四人此刻一見諸說



泮然矣合上二說此當刻于紹興已後北宋無言及者又溫公四世孫吏部侍郎開國伯伋扈高宗南渡遂家于山陰立祠奉祀則紹興時司馬氏自有人也王洧詩涑水摩崖半綠苔春游誰向此山來卽詠此刻又西安南山炭谷中亦有溫公隸書刻石世必有發其覆者待之異日

宋刻樂記

君子曰禮樂不可斯須去身致樂以治心則易直子諒之心油然而生矣易直子諒之心生則樂樂則安安則久久則天天則神天則不言而信神則不怒而威致樂以治心者也致禮以治躬則莊敬莊敬則嚴威心中斯須不和不樂

而鄙詐之心入之矣外貌斯須不莊不敬而易慢之心入之矣故樂也者動于內者也禮也者動于外者也樂極和禮極順內和而外順則民瞻其顏色而弗與爭也望其容貌而民不生易慢焉故德輝動於內而民莫不承聽禮發諸外而民莫不承順故曰致禮樂之道舉而措之無難矣右在家人卦後摩崖隸書十行字徑四寸按經文易字似古易字又似勿字然字不從犬信字多一口禮字不作豆詐字不作乍敬字非口顏字非彥皆極隸體之變承字先作和字錯字直作措字末句脫天下二字考石經者當知其異

宋刻中庸

子曰道不遠人人之爲道而遠人不可以爲道詩云伐柯  
伐柯其則不遠執柯以伐柯睨而視之猶以爲遠故君子  
以人治人改而止忠恕違道不遠施諸己而不願亦勿施  
于人君子之道四丘未能焉所求乎子以事父未能也所  
求乎臣以事君未能也所求乎弟以事兄未能也所求乎  
朋友先施之未能也庸德之行庸言之謹有所不足不敢  
不勉有餘不敢盡言顧行行顧言君子胡不慥慥爾君子  
素其位而行不願乎其外素富貴行乎富貴素貧賤行乎  
貧賤素夷狄行乎夷狄素患難行乎患難君子無入而不  
自得焉

右在樂記後摩崖隸書十行字徑四寸按經文首句

遠字書作逮施諸己句己字似包字庸德之行句行  
字先書所字君子之道下一句脫一字

宋刻損外益卦象辭

三三山下有澤損君子以懲忿窒欲

三三風雷益君子以見善則遷有過則改

右在幽居洞摩崖隸書四行字徑七寸餘益卦上作  
四畫見善以下皆泐

宋刻艮卦爻辭

艮其輔言有序悔亡

右在淨慈寺後摩崖隸書二行字徑七寸餘

宋刻左傳晏子語

晏子曰君令而不違臣共而不貳父慈而教子孝而箴兄  
愛而友弟敬而順夫和而義妻柔而正姑慈而從婦聽而  
婉禮之善物也

右在太子灣摩崖隸書二行字徑七寸餘按損益暨  
艮左傳三刻皆無款識不知何人所書案四朝聞見  
錄云錢唐自五季以來無干戈之禍其民富麗多淫  
靡之尚于齊家之道或闕焉書此以助風教况斯時  
地近皇居兩山皆宸遊所及大書深刻斷非無因而  
艮詞一刻尤爲有意谷形若口書此者殆融道器而  
一之者也

宋蒼山資福寺勅牒碑

尚書省牒

資政殿大學士左通議大夫致仕賀允中狀契勘口昨蒙  
恩除授叅知政事所有依條例合得守墳寺額依前後臣  
寮之家光功德院從來未曾陳乞今踏逐到台州天台縣  
興化院欲乞撥充本家墳寺其合得勅額仍乞改賜寺內  
不許人權殯安葬及不許官員諸色人作名目影占安下  
仍依例免州縣非時諸般科率差使借借伏望朝廷詳酌  
指揮施行伏候

指揮

計開 地山塘于后

官田叁百九十畝零

上缺 捌拾叁畝零

上缺 肆百畝零

上缺 分零

牒奉

勅宜賜資福寺為額牒至准

勅故牒

隆興元年九月 日牒

叅知政事周

尚書右僕射同中書門下平章事

尚書左僕射同中書門下平章事

資政殿大學士左通議大夫致仕賀

狀契勘

昨

蒙

恩除授叅知政事所有依條例合得守墳寺額依前後臣  
寮之家光功德院從來未曾陳乞今踏逐到台州天台縣  
興化院欲乞撥充本家墳寺其合得勅額仍乞賜以資福  
寺爲額從本家選請有道行之人住持寺內不許人權殯  
安葬及不許官員諸色人作名目影占安下仍依例州縣  
非時諸般科率差使借借每遇

聖節候將來放行度牒日許本家不拘名次陳乞撥放童  
行所有  
到公據壹道連在前伏望朝廷詳酌指揮  
施行伏候

指揮仍連公據壹道九月二十二日奉

聖旨特依所乞其徼到公據令尙書省毀



右劄送致仕賀大資

隆興元年九月 日

右碑分三列俱行書大字唯申狀作小字正書在天

台縣東賀允中字子忱上蔡人官叅政紹興初寓居

萬年有應心泉記後又徙臨海宅墓在縣東資福寺

側此其依條例合得守墳寺額敕牒也

宋六和塔尚書省牒碑

勅賜開化之寺

尚書省牒

大字行書

月輪山六和塔開化寺住持講唯識因明等論僧智曇狀

切念開化寺舊有六和塔一座永鎮江潮後緣方賊燒毀

片瓦不存遂致江湖泛漲居民不安舟楫失利紹興二十二年十一月內臣寮上言三省同奉聖旨塔廟令禮部看詳興工令臨安府轉運司同共措置後于紹興二十六年智曇蒙臨安府給帖住持修建且智曇不願申請官中錢物材料木植並是自己衣鉢并教化檀越樂施錢物今來已建七層院宇百間將欲成就委是江湖平善舟楫無虞切緣開化寺元有勅黃文字昔緣兵火燒毀不存欲望特賜給降勅黃付智曇住持伏候指揮

牒奉勅宜賜開化寺爲額牒至准勅故牒

少保尙書左僕射同中書門下平章事免押

院事兼權叅知政事錢押

同簽書樞密院事兼權叅知

簽書樞密

政事虞押 隆興二年十二月尚書省印日牒

右劄付僧曇小字正書 文不錄 隆興二年十二月尚書省印日押二

右劄付開化寺小字正書 文不錄 乾道元年七月尚書省印日押二

軍府准尚書省劄子 乾道元年八月初二日

臨安府印帖 使狎

右在杭州開化寺六和塔內壁間碑凡四列共六十四行隸額六字按咸淳臨安志吳越王就南果園建寺造六和塔宣和燬紹興重建隆興二年賜額慈恩開化教寺武林梵志謂宋開寶三年智覺禪師建以鎮江湖高九級五十餘丈二說莫能詳也惟咸淳賜額慈恩二字此牒現存不知何以衍此據智曇狀元

兩湖金石志卷九  
有勅黃文字燒毀不存是當時必有勅額咸淳志或  
別有所據歟

宋孚惠廟勅牒碑

尚書省牒湖州德清縣孚惠廟

禮部狀准都省付下兩浙路轉運司奏據湖州申據德清  
縣申據忠訓郎新差湖州排岸兼舡場李峻等狀伏覩本  
縣永寧鄉新塘土地之神姓陸名載卒吳人仕魏爲太子  
中庶子御史中丞其子政驃騎大將軍開府儀同三司舊  
有碑志歷久隳壞不存自後父老相傳且以大藏經中唐  
僧法琳辯正論所載名位爲證謹按北史陸通傳曾祖載  
從宋武帝平關中軍還畱載與其子廬陵王義真鎮長安

遂沒赫連氏魏太武平赫連氏因仕魏爲中山郡守父政性至孝其母吳人好食魚北土少得政求之每苦其難後宅側泉忽出有魚遂得以供膳時人以爲孝感所致因謂其泉爲孝魚泉後爲周文行臺左丞原州長史至通仕周終大司馬弟逞亦終太子太保以傳證之自魏至周陸氏一門忠孝有戰功惠政世被顯榮見稱前史載爲本鄉土地之神迄今七百餘年據父老所傳法琳所載與夫史傳所稱其世代爵號雖或小異而勲德顯著今昔所同蓋自我

國初以來芘護一方靈驗之跡傳播遠邇不可具陳宣和建炎間隣境盜賊竊發所至驚擾獨新塘無毫髮侵犯本

鄉土豪率衆防守夢神遣陰兵爲助他鄉人皆來避地倚神以爲安本鄉或遇水旱祈禱雨暘必應四月十三日係神生辰鄉社請迎神像以致祭獻或遇連日大雨至期必晴歲以爲驗本鄉多種菱蓮昨歲嘗爲蟲蠹所傷卽禱于神一夜大風雨其蟲掃去俱盡本鄉或有瘟疫及尋常疾病虔誠所懇至有甚危者亦獲痊安本鄉居民多以舟舡遠出商販啓行之日必先禱于神仍畫像于舡內朝夕祝之如過江湖雖遇風波之險每獲安濟去年五月內夜有賊偷土人舡一隻內有二子看守賊撐舡去十餘里殺其二子一境騷動本鄉耆保及所屬弓兵懇禱于神乞賜威靈陰助速其敗獲仍先尅定時日果於平江府捉到時刻

不差契勘本鄉土地之神經今七百餘年芘護一方素有  
靈感人戶凡有祈禱無不應驗實有功於民故有此顯効  
不敢隱默乞備申本州乞申轉運司敷奏朝廷乞賜廟額  
旌表神靈永爲一方之幸本司遂牒秀州委官前去詢究  
事跡保明去後今據秀州申差委右修職郎崇德縣主簿  
章鏐躬親前去地頭詢究新塘土地委是靈應顯著保明  
詣實本司再委右朝請大夫臨安府通判兼主管本司錢  
物官姜詵前去覆實得新塘土地委是有功於民事跡顯  
著保明詣實本司保明詣實本部尋行下太常寺勘會去  
後今據本寺申檢准建炎三年正月六日已降指揮節文  
神祠遇有靈應卽先賜額勘會今來兩浙轉運司保奏到

湖州德清縣新塘土地神祈禱靈應乞賜廟額依上件指  
揮合賜廟額申部本部今欲依太常寺所申事理施行伏  
候指揮

牒奉

勅宜賜孚惠廟為額牒至准

勅故牒

隆興元年十二月 日牒

叅知政事周押

尚書右僕射同中書門下平章事押

保義郎監潭州南嶽廟李作肅以乾道改元季秋望日捨

金建石 刊者葉光



右碑牒文三列俱行書首列有禮部申狀三十二行  
正書下列牒尾另書建石年月及刊者姓名三行亦  
正書在德清縣新市鎮碑前申狀言神之家世始末  
極爲詳盡後述靈異諸事雨暘之應疾疫之麻風波  
奉像而安盜賊尅期而獲其爲沮且祝乞賜哀封  
宜矣洪筠軒 頤煊 云元和姓纂後周大司馬陸通云

玩後晉侍中戴爲劉義真長史從宋武帝入關沒赫  
連生僑僑生政卽通父也戴載通用世次與北史同  
宋桐栢崇道觀尙書省帖碑

行在尙書戶部

准 都省批下本部申准都省批下台州天台縣桐栢崇

道觀知事賜紫道士蔣允崇狀乞蠲免科敷等事後批送戶禮部勘當申尙書省本部契勘近准禮部連送到都省批下台州天台縣桐栢崇道觀知事賜紫道士蔣允崇狀理會上件事送部勘當申尙書省本部已檢坐隆興元年十月六日指揮臣寮上言江浙之間寺院官觀除天慶報恩寺觀係崇奉

祖宗外其餘寺觀物力與民間物力袞同一例科敷十月六日三省同奉

聖旨除天慶觀報恩光孝寺觀外其餘官觀寺院並不免科敷今來台州天台縣桐栢崇道觀蔣允崇狀本觀建造徽宗皇帝本命寶殿應朝拜崇奉事件並依天寧萬壽寺

觀體例今天寧萬壽寺觀改賜以報恩光孝爲額已降  
指揮不許官員軍兵拘占安泊菽寄仍免非時借借科配  
縣司都將本觀比附臣寮功德院一槩敷配乞依宣政舊  
例蠲免科敷和折帛役錢支移折變茶鹽等事理本部  
看詳昨天寧萬壽寺觀改爲報恩光孝寺觀近承  
指揮許免科敷今來本觀既是係建造

徽宗皇帝寶殿朝拜宗奉事件去處並依天寧萬壽寺觀  
體例其本觀所乞事理理合一體已勘當乞下台州照會  
依報恩光孝寺觀已得  
指揮施行其餘不得援例已具上件因依申都省去訖今  
又承都省批下台州天台縣桐栢崇道觀道士蔣允崇狀

兩浙金石記卷九  
三  
理會上件事申省伏乞檢詳本部已申事理施行後批戶部申蔣允崇狀乞依報恩光孝寺蠲免科敷六月三十日送戶部依條施行省部除已符台州詳本部勘當事理依今來

都省批狀指揮依條施行去訖須至指揮

右帖台州天台縣桐栢宗道觀仰詳此照會乾道二年七月廿一日帖

秘書省秘書郎兼權沈押  
員外郎韓差  
侍郎曾押

侍郎方押  
尚書闕

右帖文正書廿一行中惟申狀二十一行作小字餘

俱大字在天台縣桐栢宮案桐栢宮唐景雲間爲司

馬承禎建道書謂之金庭洞天梁開平時改桐栢宮  
大中祥符時改桐栢崇道觀政和六年又于後山建  
徽宗元命殿一如宮制瓦用青色琉璃卽此碑所云  
徽宗皇帝本命寶殿應朝拜崇奉者也道士蔣允崇  
援天慶觀報恩光孝寺之例乞免科敷孝宗依條施  
行此則記事之文也又觀內衆妙臺有篆隸八分三  
體道德經刻于石幢之士宋時郭忠恕汗簡夏竦古  
文四聲韻猶及見而引之今亡

宋湖州牧守題名碑

□□  
缺

□□  
缺

□□ 缺

徐鐸 朝奉大夫元豐 下缺 崇寧元年二月

日 下缺

王璜 缺

王仲疑

朝議大夫直秘閣 下缺 二十九日 下缺

盛□ □□大夫□□五年 下缺

葛勝仲 缺

趙子漪 缺

葛勝仲 缺

方孟卿 缺

常同 紹興八年七月 下缺 元年三月 四日召赴 下缺

周葵 紹興十二年 下缺

□□ 缺

大夫 下缺

王會

楊揆

紹興二十九年六月十二日 下缺朝 大夫 下缺

王師□ 缺

以上第一列

呂希道

元豐八年 下缺 元祐二年 下缺

唐垆

元祐八年三月 下缺 元年七月初 下缺

金中 缺

□□之 缺

王□ 缺

□棣 缺

沈□ 缺

强良□ 缺

梁端□ 缺

王□ 缺

王□ 缺

王□□ 缺

朱勝非 缺

秦棣 缺

錢堪 紹興十七年十二月二十四日到任十八年八月缺  
祈乞主管台州下缺

郭城 四年五月十三日以下缺五月十一日下缺

董萃 十年二月初一日以右中大夫下缺修撰到  
任至紹興三十一年下缺



王時升

以上第二列

林希

朝請郎充集賢殿修撰元祐二年八月二十八日十三年七月改朝奉大夫下缺

鍾浚

左朝請郎

豐稷

朝請郎下缺

呂嘉

中大夫崇寧元年下缺直學士下缺

吳綱

章援

王倚

缺

盧襄

缺

□□

缺

陳由義 缺

宇文時中 缺

□□振 缺

張宇 缺

趙□ 缺

汪□ 紹興二十二年下缺學士左朝奉大夫  
年四月十八日下缺

陳□茂 紹興下缺

王十朋 下缺

以上第三列

呂溫卿 承議郎元祐四年二月初二日下缺  
初六日移知明州 六年

王安上

蔣之口 下缺年七月二十三日 下缺二十六日 赴闕

林口 缺

口口 缺

口康口 缺

韓口口 缺

鄭滋 缺

趙子口 缺

李口 缺

陳口崇 缺

秦梓 缺

王鉄 缺

周奕 缺

李琳 缺

鄭作肅 紹興三十二年下缺

年四月二十五日下缺

劉口

以上第四列

右碑四列正書剝蝕殆盡在湖州府署第一列十七人第二列十八人三四二列俱十七人所記牧守起元豐七年訖乾道四年按舊志名有可補者盛下是瑜字王師下是心字之上是晁補字王下是澤字棣上是葉字沈下是鱗字蔣之下是幹字李下是光字趙字下是漪字劉字下是越字

宋陶定定山風水洞題名

新江西提點刑獄吳興陶定被旨奏事乾道庚寅夏六月  
癸亥來游

右在定山摩崖正書五行字徑一寸餘左行

宋白雲昌壽觀敕牒碑

尙書省牒台州白雲昌壽觀

五月二十五日奉

聖旨台州崇道觀西白雲庵一所屋宇七十餘間并山地  
庵基可令見住道士曹葆達領衆焚修專一崇奉皇帝本  
命香火以白雲昌壽觀爲名舊有江州廬山先置到義興  
土白冷水源三莊田產三千餘畝並撥充本庵常住在上

租稅依崇道觀例施行  
江州照會令台州崇道觀

將每歲租課拘收支撥供贍齋糧不許官司

令道正石葆璋充都道正提點本觀香火

牒奉台州崇道觀西白雲觀一觀呈字小十餘間共山款

勅宜賜白雲昌壽觀爲額牒至准

勅故牒

乾道五年五月 日牒

叅知政事陳

尚書右僕射同中書門下平章事

劄

五月二十五日奉

聖旨台州崇道觀西白雲庵一所屋宇七十餘間并山地  
庵基可令見住道士曹葆達領衆焚修專一崇奉皇帝本  
命香火以白雲昌壽觀爲名舊有江州廬山先置到義興  
土白冷水源三莊田產三千餘畝並撥充本庵常住在上  
租稅依崇道觀例施行

江州照會令台州崇道觀

將每歲租課拘收支撥供贍齋糧不許官司

令道正石葆璋充都道正提點本觀香火

右割付白雲昌壽觀

年五月 日

天台山都道正主管教門公事提點白雲昌壽觀香火石

葆璋等奏本觀昨於乾道肆年伍

下缺

聖旨賜額專一崇奉

皇帝本命香火緣本觀元係庵宇崇奉不便遂於今年柒月內建立

本命大殿壹所已訖未有

殿名及未有印記兼元降

聖旨撥賜江州田叁莊計叁阡餘畝充贍道衆竊緣本觀取江州莊所往來僅四千餘里每歲差

下缺

租動須數人

經年更替所收租米出糶變貨歸觀其耗極大所得無幾

臣愚欲望

聖慈特降

睿旨令戶部行下江州將

件田畝山園屋宇等物除



舊山觀常例 種外其餘盡行拘收 賣乞行下

台州於沒官田庄內止乞兌撥田壹阡伍伯畝臣 次

踏逐 台州臨海縣靖安鄉徐懷絕沒官田地伍伯餘畝

及屋宇等乞先行兌撥外其餘 台州 沒田產續

次踏逐一面經本州陳請得永遠專一崇奉

香火綿長所有

殿名今欲擬作

洪慶之殿外印記欲乞就本州出給餘乞依

行伏候

勅旨十一月二日三省同奉

聖旨依

右劄付台州白雲昌壽觀

乾道六年十一月

應彥刊

右牒乾道六年立高四尺五寸廣二尺六寸分列三層上二層刻牒文下二層刻尙書省劄付二通牒正書七行大字行書並題銜九行劄二並正書共二十六行年月下並有尙書省印及押字在天台縣桐柏觀西按縣志觀本唐大中六年建舊名白雲庵乾道間內侍鄜守寧棄官居之乞改爲觀此奉祀本命之由來也四年道士曹葆達請于朝故贈額並撥江州廬山莊田三千餘畝以贍之而道士又以江州往反

經年更替費耗極大所得無幾復欲以台田易之詳  
見二劄中牒尾押字二人叅知政事陳者俊卿也尙  
書右僕射同中書門下平章事者蔣芾也玉海載賜  
名白雲昌壽觀本命殿賜名洪慶今劄中有云所有  
殿名今擬洪慶之殿與玉海合洪筠軒云赤城志靜  
安鄉在臨海縣西北五十里俗以靜爲靖誤也

宋林景度等龍井題名

林景度韓無咎李秀叔司馬季思崔子霖韓子師乾道辛  
卯八月晦日自龍井來

右在龍井摩崖正書六行字徑二寸韓無咎名元吉  
南渡後官尙書東萊呂成公其壻也

宋錢端禮般若臺詩刻

大資錢相公詩

□□雲收出遠林兩山不隔□□鳴層臺迥出層霄外霜

□還同霜月平脩竹可人無俗韻疎梅能事□僧清寶□

遍□虛空界深夜猶聞梵唄聲

右詠般若臺一首贈源□長□松窗道人書

□□先生篇章翰墨深入眉山長公之室其得意處殆不

可辨□□□□此詩下缺異子嘗推為□□第一隻眼

雙溪葉下缺

儒與墨歧之者衆下缺直造門室未易下缺

大資參政相公政事下缺耳目炳炳然下缺寵賁豈唯使

下缺

乾道七年口月五日

下缺

禪院住持傳

下缺

立石

郡下

缺

右碑題額六字詩大字七行跋小字五行俱行書舊  
 在白雲山洪筠軒移至臨海學宮松窗道人錢端禮  
 號宋史錢象祖傳祖端禮字處和以恩補官通判明  
 州治有聲厯官至叅知政事兼權知樞密院事除資  
 政殿大學士提舉德壽宮改洞霄宮謚忠肅又黃巖  
 志載大澤塘詩七截一首其自序曰松窗居士以淳  
 熙丁酉歲二月二十日來游瑞巖長安李才翁孫壻  
 王鐸方外支道成同行圍棋久之保口禪師證明詩

云塵纓久欲濯滄浪今日來遊大澤塘水似我心  
似水更無一事可思量則提舉時作也

安趙汝愚等定山風水洞題名

開封趙汝愚爲正字時聞□□□風水洞奇

勝□□九年秋七月□后同游

右在定山摩崖正書三行字徑一寸按宋史本傳汝  
愚以孝宗時擢進士第一簽書寧國軍節度判官召  
試館職除秘書正字題名所泐當是乾道紀元也

宋周聳等鳳皇山題名

淳熙甲午中冬十四日□會□□者□□轉運使燕□□  
□□舉常平□□□□舉鹽香周聳民望轉運判官□

偉節紹示知軍州事蔡口聞曉

右在鳳皇山排衙石摩崖行書七行字徑二寸

宋般若會善知識祠碑

般若會善知識祠記

紹興丙子大慧禪師宗杲得旨住育王廣利寺師還自嶺南既主叢林湖海衲子輻湊聚衆一千二百法席爲天人師廣利素號望刹至是食口弗給有大慧高弟擇微者衆推苦行號微高僧慨然而起曰吾事大慧責居遐荒逮茲去此十有七年萬死一生備嘗艱棘今龍天歡喜祖道中興謂爲緣化之倡乃帥同志二十輩化八萬四千信士各捐已帑名般若會裒爲求田供衆之資時郡將貳卿方公

滋首爲之勸遠近樂施財帛雲委未口大慧有旨移住徑山其嗣大圓璞公繼之乃命其徒彥平就奉化東村請官地海塗圩而爲田工傭浩博以般若會所儲用之不足又請大慧衣鉢助之合金十萬緡施及三年而大圓順寂衆又以其嗣今住持普門廓公繼之時丞相岐國湯公思退口口大慧爲方外友捨金協濟又得無相大師靖公抵財建造莊院名般若莊自紹興戊寅至乾道丁亥始克有終侍御公伯庠作記以美之而後大慧遷化門人弟子傳法住持遍九天下獨微公卷而懷之退處廣利上塔堅坐一紀不出門限一飯之外不接俗務看閱藏經已七遍矣達官貴人招之不去其高致追媿古尊宿豈今日學道者行



能彷彿乾道二年春予以先公太監大祥至廣利作佛事  
因訪微公公與大慧皆先世道舊相見慰籍久之論及塗  
田首尾實微公權輿又欲令小師祖印募緣甃砌大嶺之  
上塔磚路數千丈且曰他日路成又將塑像大慧大圓普  
門三善知識塔院後舍配以造塔真戒大師振公以八萬  
四千信士名銜函貯其上誓將朝夕夤奉以爲善知識祠  
堂香火惟子爲我記之予巽謝未遑旣畢事微公三令祖  
印持書叩門其請愈堅且曰子不我記非獨慢我是慢大  
慧予不敢辭乃爲之說曰釋迦如來以提婆達多爲善知  
識故蓮華經云由提婆達必善知識故令我具足六波羅  
蜜又妙莊嚴王本事品云若善男子善女人種善根故世

世得善知識其善知識能作佛事示教利喜令人阿耨多  
羅三藐三菩提子仲二子以訂微公諸方衲子多見善知  
識者必有其人能辨緇素則一生參學事畢脫或未喻其  
可以卜度耶謹記

淳熙二年六月 日修職郎前兩浙東路安撫司准備差  
遣李泳記

御筆賜冲虛先生賜名業知微書額

寶林蘭若苾芻行久書

幹緣知塔苾芻祖印立石

右碑題額八字文十九行俱正書在鄞縣案宗臬與  
宏智皆僧中龍象而各傳一宗周葵所謂以道相與

無彼此之間也故嗣天童者宗杲主之斯時輻湊者  
千二百人高弟擇微因率同志化八萬四千信士爲  
般若會作求田供衆之資微公又將塑像大慧大員  
普門三善知識于塔院以八萬四千信士名銜函貯  
其上朝夕寅奉以爲善知識祠堂香火屬李泳記之  
愚子作三寸像便欲題名奢望微公此舉烏在其不

大書深刻耶

宋天童寺應庵和尚石刻

應庵和尚真蹟

大徹授機句當陽廓頂門相從今四載徵詰洞無痕雖未  
付鉢袋氣宇吞乾坤却把正法眼喚作破沙盆此行將省

觀切忌便塚根吾有末後著待歸要汝遵

頌送傑侍者還鄉辛未正月上元日應庵老僧口

右刻行書十二行碑首八分書六字刻於佛果法語  
之上方在鄞縣天童寺

宋天童寺佛果老僧法語石刻

上闕

設教口口口是故最口口最上機雖口示機開多顯

口之際靡不直口口盈水投針口口口把明鑑口口口

達磨口口口口下太口口口口機

下缺

紀極然鞠其歸

着無出直 人心地既明無絲毫隔礙脫去勝負彼我是

非知見解會透到大休大歇安穩之場豈有二致哉所謂

下川異流同歸于海要須是个向上根器具高識遠見有

紹隆佛祖志氣然後能深入闡奧徹底信得及直下把得住始可印證堪爲種草捨此切宜寶秘慎詞勿作容易放行也

五祖老師平生孤峻少口可乾曝地壁立只靠口口着常白云如倚一坐口口山豈可落虛弄滑 人把个沒

滋味鐵口口口須拈似學者令

下缺

荷淨然無一事山是

山水是水更應轉向那邊千聖籠羅不住處便契乃祖上來 正傳持正法眼藏及至應用爲物仍當驅耕夫牛奪飢人食證驗得十成無滲漏卽是 본家道流也

摩竭陀國親行此今少林面壁全提正宗而時流錯認遂尙泯默以爲無縫罅無摸索壁立万仞殊不知本分事恣

情識搏量便為高見此大病也口上來事本不如是巖須  
云只露目前些子个如擊石火閃電光若措不得不用疑  
着此是向上人行履處除非知有莫能知之口口喫茶口  
口喫茶秣魔擎杖雪峯觀 一指歸宗下

缺 截剪斷葛藤大機大用千口口別會歸一源口以與口

黏去縛若隨語作解口須與本分草料譬如十斛驢乳口  
以一滴師子乳滴悉皆迸散要脚下傳持相繼綿遠直須  
不徇人情勿使容易乃端的也

末後一句始到牢開誠哉是言透脫死生提持正印全是  
此个時節唯踏着上頭關捩子底便諳悉也

隆公知藏湖湘投機還住北山十餘年真探蹟精通本色

袖子遂舉分席訓徒已三載予被精眷口移都下天寧欲  
得法語以表道契因爲書此數段宣和六年十二月中澣  
佛口老僧克勤

右克勤法語草書四列上列已殘缺僅存三十餘字  
在鄞縣天童寺

宋天童寺宏智老人畫像

天童宏智老人像

育王妙喜宗杲贊

烹佛烹祖大爐鞴煅凡煅聖惡鉗鎚起曹洞於已墜之際  
鍼膏盲於必死之時善說法要罔涉離微不起千座而變  
荆棘林爲梵釋龍天之宮而無作無爲神澄定靈雪頂龐

眉良工寫出兮不許僧繇知虛堂挂張兮梁寶公猶迷箇  
是天童老古錐妙喜知音更有誰

右畫像上刻贊語十一行行書在鄞縣按上諸刻皆  
在天童寺天童自大覺禪師璉公居之名振天下紹  
興時大慧禪師宗杲得旨持住衲子輻湊聚衆一千  
二百法席爲天人師規模宏遠諸刻應卽在斯時也  
宋延慶寺初祖達大師畫像

初祖達磨大師

相赤色

師姓刹帝利名菩提多羅南天竺香至國王第三子後遇  
二十七祖般若多羅至本國知師蜜迹令與二兄辨寶珠  
時二王子皆曰此珠七寶中尊固無踰者唯師獨曰此是



世寶未足爲上於諸寶中法寶爲上此珠光明不能自照  
要假智光光辨於此旣辨此己卽知是珠旣知是珠卽明  
其寶若明其寶寶不自寶若辨其珠珠不自珠珠不自珠  
者要假智珠而辨世珠寶不自寶者要假智寶以明法寶  
然則師有其道其寶卽現衆生有道心寶亦然祖嘉其辯  
慧謂曰夫達磨者通大之義也因易名菩提達磨梁普通  
八年航海至金陵見武帝語不契乃折蘆渡江造嵩山少  
林面壁九年後以衣法付慧可說偈曰吾本來茲土傳法  
救迷情一花開五葉結果自然成至魏太和十九年十月  
五日示寂葬于熊耳山之定林越三載魏宋雲奉使西域  
迴遇師于蔥嶺翩翩獨逝雲歸具奏其事帝令啓壙唯空

棺隻履存焉唐太宗諡圓覺大師塔曰空觀

右畫像上刻讚十九行正書在鄞縣

宋延慶寺四祖信大師畫象

四祖信大師

相紅白色

師諱道信姓司馬蘄州廣濟人生而卓異年十四謁三祖  
粲大師曰願和尚慈悲乞與解脫法門祖曰誰縛汝曰無  
人縛曰何更求解脫乎師於言下大悟自是攝心無寐脅  
不至席垂六十年唐武德甲申始返蘄春破頭山於時學  
徒殆若雲委後傳衣法于忍大師說偈曰花種有生性因  
地華生生大緣與信合當生生不生迄高宗永徽辛亥閏  
九月四日忽垂誠門人曰一切諸法悉皆解脫汝等各自

護念流化未來言訖安坐而逝壽七十二塔于本山明年四月八日塔戶自開儀相如生後人不敢復閉代宗諡大懿禪師慈雲之塔

右畫像上刻讚十五行正書在鄞縣此題延慶寺有初祖四相字想二十八祖俱有傳刻今存者止此二石也

宋高麗寺蠲免劄付碑

九月三十日奉聖旨慧因敎院應諸官司試院并指占並

永與蠲免

小字正書

右劄付慧因敎院淳熙元年十月一日

大字正書印文不辨年月下有二押

行在尚書禮部

大字正書

准淳熙元年九月三十日勅中書門下省九月三十日奉  
聖旨慧因敎院應諸官司試院并指占並永與蠲免奉勅  
如左牒到奉行前批十月一日申□□禮部施行仍□□

□□□須至指揮

細楷書四行

右帖慧因敎院仰照會淳熙元年十月日

大字正書印一文不辨

官押

大字正書

右在慧因寺碑凡二列上列可見者四行下列八行  
是刻漫漶過半僅存前後大字以碑陰證之此持住  
僧惠高之請也至七年講師清素并序厯朝恩渥而  
刻諸石此劄付亦刻于是時諸志乘皆未之載

宋秀州陸宣公祠堂碑

古者建學先聖先師各因其國之故國無其人然後合宅國而釋奠焉由漢以來先聖先師之位雖定于一然郡邑先賢亦往往祠于學官猶古意也唐史載陸宣公贄蘇州嘉興人石晉時吳越王元瓘奏以嘉興置秀州城東橋以宣公名者先老相傳公所生之地郡學故有公祠今郡守直顯謨閣東平呂侯正己復緝而新之維秀陪翼

行都典治爲天下劇侯獨置迎將期會之煩表公以風厲多士其知本務矣初公事德宗入翰林爲學士方禁旅四出伐叛公深以根本爲慮論居重馭輕之執至孰悉也未幾涇卒內訌迄如公憂奉天艱難之際雖號親近而志實不大紓職在書詔因得具著天子悔過罪己之意聞者流

涕人心已離而復合以使事抵李懷光於立談頃拔李晟  
之軍已而平賊泚收長安獨晟軍是賴官守所及觸見一  
二已足以再造唐室苟帝以國聽焉其所就何如哉起建  
中厯正元垂二十年離合從違之變繁矣確乎其不移温  
乎其不懟亶亶乎其不厭所積之厚豈世士所易窺邪晚  
節爲相經世之業出之固有次第始見白臺省長官各舉  
其屬議輒見格然綱條本末載於章奏者尙可復也旣貶  
忠州闔戶人不識其面專以方藥自娛蓋畏天命畏大人  
負罪引慝於幽閒隱約之中其志念深矣雖德宗確猜忌  
克猶勞問有加非公之忠敬有以發之邪彼謂避謗不著  
書殆知公之細者也秀維公里雋彥林立公之精縕列於

鄉論者舊矣故於祠宇之成誦所聞以質其中否焉淳熙四年四月旦日東萊呂祖謙記廉里龔敦頤書後十有一年五月辛亥郡太守天台陳揚善立石

嘉禾曹澂男日音孜刻

右碑文正書十七行在嘉興縣按祠在宣公橋景定癸亥改爲書院大德九年復爲祠見牟巖記後至元二年僧據爲菴至正十四年總管劉貞復建書院見劉基記龔敦頤遂昌人博通羣書撰元祐建中列傳譜述一百卷淳熙間脩國史洪邁請加甄錄授穎州文學仕至宗正丞陳善揚按台府志紹興十八年王佐榜有陳舉善仕御史終秘閣修撰紹興二十一年

趙遠榜有陳嘉善舉善弟也知江陰軍並黃巖人揚善亦其昆季歟

宋李直卿題名

□□□□□□巖同學□瞻勝一日□前之□淳熙丁酉季夏二十有五日淨□□□道人李直卿書

右摩崖正書前泐存五行字不等徑一寸五分

宋英顯武烈忠佑廣濟王像碑

吾本吳會人間生於周初後七十三代爲士大夫未嘗酷民虐吏性烈而行察同秋霜白日不可犯後西晉末降生於越之西雋之南兩郡之間是時丁未禊甲子辛亥二月三日誕祥光羃戶黃雲迷野居處地俯近海里人爲清河



叟曰君今六十而獲貴時嗣童稚時不喜嬉戲每慕山澤  
往往語言若有隱顯晝誦羣書夜避衆子自笑且樂身體  
光射居民祈禱則余嗤而訕長嘯曰土木而能衣人之衣  
食人之食享之而有應謗之而有禍我爲人而焉無靈乎  
自後夜之怪夢或爲龍或爲王者天符爲水府曹自怪而  
不甚信爲吉兆後三農憊旱膏澤無甦舞雩祝神恬然無  
驗余思曰夜寐乖夢治水府今夕當驗夜往水際以夢中  
官牒河伯而驚魂尤恐忸怩不能忽爾之間雲四合風雷  
震一吏稽首余前運判徙居余曰非我也我迺張戶老之  
子名亞後緣水府得  
達故字霽夫吏曰奉命促子余曰家人如何吏曰  
先到治所余皇皇未決吏揖上一白□□去俛首里閤風

兩聲中頓失鄉地到一山連劔嶺□□參宮星也若鳳凰之

偃下有古湫引吾入一巨穴門有數石筍吏曰民之所禱

祝此石而有應曰雷柱吾方褰衣入穴吏曰君記周室為

人七十三代陰德傳家而迄今否余方大悟若夢覺也吏

曰君在天譜得神之品於人世少有知之者晉不日有中

興之兆□□□□而顯化余曰謝天使嚮報也入穴則若

墮千仞之壑□□而足不沾若騰身虛空有王者之宮有

禁衛余□□□□若都其間改日作儒士而往咸京講姚

□之故事□河內傳焚獻者切記□土木而遊文人之水

淳熙丁酉六月會稽陳師中錢塘刻

右在吳山文昌廟正書二十六行隸書十字題額下

有王像乘白騾二童子一武士隨行卽今時所祀文昌帝也頂現一光中有二像乘蛇而行不知何說刻文似箕壇語有未可句讀處以宋刻存之

宋何伯應等題名

何伯應潘安叔江幼度以淳熙丁酉十月六日自高麗來游伯應之姪惟澂子惟滋姪孫林安叔之子景羔景西景開侍行僧師觀同至

右摩崖行書六行字不等徑一寸

宋范成大等龍華寺題名

至能季思壽翁虞卿子宣正甫渭師子餘無咎淳熙戊戌季春丁巳同游子師不至

右在龍華寺後摩崖正書七行字徑三寸

宋周必大等龍華寺題名

周子充程泰之劉正父王仲衡芮國瑞陳敦仁吳希深木  
韞之齊子餘以淳熙己亥季春廿有二日同來

右在龍華寺後摩崖正書七行字徑三寸

兩浙金石志卷九 香山縣知縣候補通判仁和周兆蕙刊

臨海洪瞻墉校